



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma : Tir Yimiyim

tiryimiyim@aolima

tir yimiyim

TAPAK 7



Rodri nem UEFA Champions League
Player of the Season naroküm agütsü



Taoba Italy PM Silvio
Berlusconi süogo

VOL. XX NO. 240 (ADOK 240) DIMAPUR SANGTENNÜ (TUESDAY)

AAMI (JUNE) 13 2023

₹ 5.00

Centre-i Rs 1,18,280 crore tax devolution agütsüogo

New Delhi, June 12, 2023 (Agencies): Centre sorkari Hombarnü state sorkartem nem tax devolution indang instalment tasembuba agütsüogo.

Centre-i Rs.59,140 crore normal monthly devolution dang nungi teimba Rs.1,18,280 crore agütsüogo ta Union Finance Ministry-i metetdaksü.

Sorkari state tem senotsü nüngdakba agütsütsü nangzüka aliba ama instalment tasembuba agütsüogo. Iba ya capital spending, finance development & welfare-related expenditures, aser priority projects o schemes atema amshitsü asoshi agütsür" ta Ministry-i metetdaksü.

"State sorkartem nem June 2023 ita nung regular instalment den ano advance instalment ka agütsütsü aliba agütsür" ta parnokisa metetdaksü.

Centre-i June 12, 2023 nü agütsüba tax devolution indang instalment tasembuba nung Nagaland nem Rs 673 crore agütsüogo.

Churachandpur aser Kangpokpi nung raratep

Imphal, June 12, 2023 (Agencies): Hombarnü Manipur kübok Kangpokpi aser Churachandpur district tem nung lendong balala atalokba osang angazüker.

Tanü nisung kari Kangpokpi district kübok Khamenlok amak aser idangji nisung pezü tashi yirur Raj Medicity nung anepaludar.

Ano, tanü Manipur Governor-i Lamka semdangba mapang nisung kari Churachandpur kübok Loklakphai yimtsüng amak.

Tanü nikonngang 2:30 ako meta Loklakphai yimtsüng amakdang arishi küm 22 tain tebur ka tepset ta osang ajanga ashi.

Maneni, June 11, 2023 nikonngang 12:30 ako meta mejangjatetba lanur ana Ichum Kom Keirap nungi Waroiching/Leimaram tesemi aruba yimdaklirtemi apu.

Ajisüaka Ichum Kom aser Leimaram Waroiching nung aliba yimdaklirtem, Civil societies aser media teyaritep ajanga lanur anaji police ket nung agütsüogo.

"Kom Keirap, Waroiching, Leimaram yimdakirtem, civil societies, media fraternity, CAPF/Army personnel yaritepa lanur ana District Police ket nung agütsüba atema kanga pelaba metetdaksür" ta Bisnupur SP Heisnam Balram Singh-i ashi.

Manipur nung May 3, 2023 nungi tenzüker lendong balala ataloka arudang nisung 121 taküm samaogo aser 352 yiru.

Iba mepetmesü tenzüker kiojen rongdoktsüba lendong 4305 atalokogo aser nisung 60,152 tashi pei talidak toktsür

State-wise distribution of Net Proceeds of Union Taxes and Duties for June 2023

Name of State	Total (Rs. Crore)
ANDHRA PRADESH	4787
ARUNACHAL PRADESH	2078
ASSAM	3700
BIHAR	11897
CHHATTISGARH	4030
GOA	457
GUJARAT	4114
HARYANA	1293
HIMACHAL PRADESH	982
JHARKHAND	3912
KARNATAKA	4314
KERALA	2277
MADHYA PRADESH	9285
MAHARASHTRA	7472
MANIPUR	847
MEGHALAYA	907
MIZORAM	591
NAGALAND	673
ODISHA	5356
PUNJAB	2137
RAJASTHAN	7128
SIKKIM	459
TAMIL NADU	4825
TELANGANA	2486
TRIPURA	837
UTTAR PRADESH	21218
UTTARAKHAND	1322
WEST BENGAL	8898
Grand Total	118280

relief camps 272 nung jenoka lir. Külen, Ministry of Home Affairs (MHA)-i June 30, 2023 tashi Central Armed Police Forces (CAPFs) company 114 mapa inyaksü mapang atsülangogo.

Külen, Manipur Chief Minister N Biren Singh-i June 12 nü nübertem dang yimjung aser putepa aliba tensa bener arutsü atema temulung agütsütsü mepishia metetdaksü.

Ozüng alema arurtem dang nungi sorkari state aser loktiliba kümzüka ayutsü ta pai ashi.

"May 3 nungi lendong balala atalokbatem süio. Manipur state nung alirtemi yimjung aser teputep adoktsü atema temulung agütsütsü" ta Manipur CM-i osangbener den jembidang ashi.

Iba tensa atalokba bushisüngdangtsü atema enquiry committee ka tentetogo aser ochiji metettsü. Nübertemi pei tebilembatem azioktsüla aser yimjung bener arutsü atema inyakba nung yariteptsüla, ta paisa ashi.

State cabinet-i prefabricated houses 4000 tashi yanglutsü lemtetogo aser iba ya pei kimungi meyipa moutettsüpurtem asoshi lir, ta Biren Singh-isa shisem.

State sorkarisa pei ki yanglushitsü mulungertem nem teyari agütsütsü. Lendong balala nung ki tera rongdoktsüba mesüra raksatsüba yanglushiba nung yaritsü, ta paisa metetdaksü.

Lendong balala nung samartem asoshi sorkari AADHAR, NFSA, Health cards, Bank accounts, driving licences amala agütsüba maparen tenzükogo, ta Manipur sorkarisa ashi.

Tanur kilir ayuba ya Child Labour lir; Ozüng ka nüngdaker

Kohima, June 12, 2023 (TYO): Hombarnü Nagaland nung "Social justice for all, end child labour" omen nung ajemdaker World Day Against Child Labour mongogo.

"Nagaland nung industry balala nung tashiyim agi tanur nem mapa inyakdaksübabo mali saka kidang teyariteper ayuba nung tashiyim agi tanur nem mapa inyakdaksür" ta Childline India Foundation Center Coordinator, Neingu Kulnu-i ashi.

Oriental College Kohima nung World Day Against Child Labour ayongzüka amongdang Kulnu-i "Nagaland ya Khristan state ka süaka tanur nem tashiyim agi mapa inyakdaksür" ta sasaa bilemba olen ka ashi.

Nagaland nung takar kibongtemi meta talang pilar alidak sensaker kibongtem nungi tanurtem anepalutsü aser züngdaksütsü ta shia Kohima o Dimapur nung anir arua kilir inyakdaksür, ta lai ashi.

Ajisüaka, tanurtem anir aruba sülen parnok tia takar kar dang kibong tajung ajurur aser parnokibo shitakba anepalur aser shisaliok züngdaksür. Ajisüaka kibong teimba kati kilir kümdaksür tashiyim agi mapa inyakdaksür, ta Kulnu-isa ashi.

"Tashiyim agi mapa inyakdaksüba tanur mesüra anepalu nüngdakba tanurtem indang osang Childline number

1098 ajanga tongrepretepra kümzüksü akok. Tanurtemji pei tsürabur dangi meyipa yoktsü mesüra Child Care Institutes nung anioktsü aser ibala osang sangoktsür maitsü miimbanga dang ayur" ta laisa metetdaksü.

Iba sentong ya Oriental College Kohima nung Drama Club & English Department-i Childline Kohima den yaritepa ayongzüka.

Ano, Ferrando Domestic Workers' Alliance (FDWA)-i Don Bosco Higher Secondary School Kohima nung World Child Labour Day sentong ayongzüka agidang Childline Kohima ketdangpur Pelezanuo Elizabeth-i tongti o jembi.

"Arishi küm 18 ser teküpokpur child labour nungi kümzüka ayutsü atema Nagaland sorkari Child Labour Act ano meyanglu lir" ta Pelezanuo Elizabeth-i ashi.

India sorkari 2016 nung Child Labour (Prohibition & Regulation) Amendment Act yanglu agizükogo saka Nagaland Legislative Assembly-ibo iba Act ano magizük lir ta lai ashi.

Indian Constitution indang Arrla 23 aser 24 ajanga arishi küm 14 teküpok tanurtem factories aser mines aser lendong aliba tesemtem nung mapa meinyakdaksütsü noktanga lir. Ajisüaka Nagaland nungbo ibala ozüng kecha mali aser kidang teyariteper ama tanur nem

tashiyim agi mapa inyakdaksür ta Elizabeth-i metetdaksü.

Kohima nung child labourers 700 tema lir aser ita shia Child Line dangi tanur dak tashiyim mapa inyakba ken o 3-4 osang arur, ta laisa ashi.

"Kilir ama yua tashiyim agi tanur nem mapa inyakdaksüba onoki puteter saka Nagaland nung Child Labour (Prohibition & Regulation) Amendment Act mapa küma metenzükba ajanga ozüngi melaba mapa meinyakteter" ta Elizabeth-isa metetdaksü.

International Labour Organization (ILO)-i 2002 nung mezüng atema World Day Against Child Labour amongtsü tenzüka. Child Labour tebilemstü osang lemsateptsü aser alima nung Child Labour samatsütsü tebilemba nung iba anogo amonger, ta laisa ashi.

Nübertem aser sorkari social justice aser child labour angatetra iba khuret agentettsü kechiyong ana ya sendaktepa lir ta Elizabeth-i ashi.

Child and Adolescent (Prohibited and Regulations) Act 1986 ajanga arishi küm 14 teküpok tanur kilir mesüra tanga mapa kecha meinyakdaksütsü noktanger. Ano, iba Act ajanga arishi küm 15 nungi 18 tsüngda tanurtem non dangerous occupation aser procedures inyaksü dang melar, ta laisa metetdaksü.

Manipur Governor Uikey-i Churachandpur semdang



June 12, 2023 nü Manipur Governor Anusuiya Uikey-i Churachandpur nung relief camp ka semdanga sensaksemdang agiba noksa ka angur.

Churachandpur, June 12, 2023 (Agencies): Manipur Governor Anusuiya Uikey-i Hombarnü Churachandpur district semdang aser tensa asadanga liasü.

Tanü Governor Uikey Churachandpur Government College, Salt Brook School aser St. Mary's School nung lapoka aliba relief centre asem semdang aser nüngdakba teyari agütsütsü nangzüka.

"Peace committee nung menden ka ama ni lokti ajak nungi tebilembatem aser osangtem metetepelatsüla. MLA tem,

ketdangsürtem aser lennirtem den ajurutepe state nung yimjung bener arutsü" ta lai osangbener den jembidang ashi.

Governor Uikey-isa 27 Assam Rifles, Tuibong nung Indigenous Tribal Leaders Forum (ITLF) dena CSOs den senden ka amen.

Iba senden nung ITLF-i Governor nem Manipur nung lisopurtemi reshikangshi ajuruba indang memorandum ka agütsü.

ITLF ya Churachandpur district nung CSO ka lir aser parnoki Kuki-Zo nungeri ketdangsübaren balaka aginüba

indang memorandum nung shia lir.

Parnokisa peace committee ka metetdang loktiliba nung putepa alitsü tensa ka nüngdakba indang ashi.

Meitei nungeri Kuki-Zo anema raratsü sangoktsür aliba mapang ka nung yimjung indang jembitsüba tim masü aser talisa mapa tamajung inyaktertem peace committee nung lir, ta ITLF-isa metetdaksü.

"Yimjung dang nungibo lemtet ka agiba tajungba. Kuki-Zo nunger atema political solution nüngdaker aser ibaji tejak repranga inyakba Manipur sorkar aser Meitei nunger den ketdangsübaren balaka asütsüba lir. Tenem aser lenden bendangogo aser joko ketdangsübaren bendangtsüba dang anünga lir. Iba ya inyak nung dang yimjung alitsü" ta ITLF-isa ashi.

Honibarnü Ministry of Home Affairs (MHA)-i züngsem 51 agi akümba peace committee ka tentet aser iba nung mendenji Manipur Governor lir.

Mokokchung nung RI, VDP aser MR atema workshop agütsü



Dimapur, Aami/June 12 (TYO): Department of Health and Family Welfare, Mokokchung ajanga June 12, 2023 nü Routine Immunization (RI) strengthening, vaccine preventable Disease (VDP) surveillance and Measles and Rubella (MR) Elimination atema anogo ka workshop ayongzüka liasü.

Iba workshop ya Conference hall, Chief Medical Officer's Office Mokokchung nung

ayongzü, kong shisalen sayur Dr. Shiela Longkumer aser Dr. Takosunep DPO (UIP & RCH) liasü.

Iba workshop indang technical session nung shisalen sayur temi COVID-19 vaccination nungi angazütsü aser RI tashi itshidaksütsü indang jembia liasü.

India nung MR samatsütsü AEFI Basic concepts, anaphylaxis ketdangütsü, AEFI

investigation, mozüki aser private practitioner tem teinyaktsü, AFP surveillance, overview and updates, DPT Surveillance overview and updates, RI performance health facility onüktem nung ajemdaker shisa agitepa liasü.

Iba workshop nung CMO, Dy CMO, DPO (NCD), Senior Medical Officers, Medical Officers, Epidemiologist, BPMs, BACs aser IDSP staff tem dena liasü.

Nagaland nungi kaketshir 42 Chhattisgarh-i ogo

Dimapur, Aami/June 12 (TYO): Ek Bharat Shreshtha Bharat, Yuva Sangam Phase-II nung shilem ka ama hopta ka Cultural Exchange Programme nung shilem agitsü atema Nagaland nungi kaketshir 42 Chhattisgarh-i June 12, 2023 nü ogo.

Northeast Region aser linük tanüngba tesemtem tsüngta sobaliba jenjang ajungkettsü aser tesendaktep alitsü nükjidong nung India sorkari Yuva Sangam ya February 6, 2023 nü tenzüka liasü.

Ibai Northeastern states tem asoshi multi-dimensional discloser sentong ka lir, aser iba mapang parnoki tesem balala repranga jajatsü, cultural exchange aser sensaksem sentongtem alitsü.

Tang asoshi Nagaland ya Chhattisgarh den atar, aser Higher Education Institution ya National Institute of Technology, Riapur (NITRR) nung anenzüktsü.

National Institute of Technology (NIT) Nagaland nungi kaketshirtem den tesayur pezü guest Higher Educational Institution alitsü aser parnoki Raipur nung sobaliba dak sendakba tesem balala sema jajatsü aser sobaliba, technical

aser südok-sünem sentong balala nung shilem agitsü.

Nagaland nungi kaketshirtem asoshi iba tour flag off asüba sentong NIT Nagaland, Chumukedima nung agia liasü, kong tongti tesemdang, Former Director & Deputy Legal Advisor, Department of Atomic Energy Mumbai, Dr. Ranjit Prasad Acharya-i linük nung lanurtemi Azadi Ka Amrit Mahotsav nung tongti shilem agitsü ayongzü.

Pai Nagaland tenüng nung aoba kaketshirtem dang Naga nunger yimya tajung Chhattisgarh nübur dang sayutsü ayongzüka liasü.

Iba sentong nung tetushi tesemdang, Associate Professor, Department of Mathematic, NIT Silchar, Dr. Kedar Nath Das-i ashiba agi, Northeast India nung aliba lanurtem India nung danga tesemtem nung aliba lanurtem den sako kumdaksütsü nükjidong nung Ek Bharat Shreshtha Bharat kübok Yuva Sangam ya Ato Kilonser Narendra Modi indang mapa tajung ka lir.

Iba sentong nung Director of NIT Nagaland, Dr. S Venugopal-i jembidang, asen linük nung aliba nüburtem sobaliba tsütsü

lungjema lir, saka yimya balala nung amshir, ta ashi.

Wadang ajak nung tetsür temi shilem magira asen linük nung terenlok malitsü, ta pai ashi aser iba sentong nung kaketshir tetsür aikati shilem agiba atema pelaba lemsatepa liasü.

Kaketshirtem pela agizükba o jembidang, iba sentong nükjidong ya Nagaland indang tajung sayutsüba lir, ta Nodal officer for Ek Bharat Shreshtha Bharat Nagaland state and Associated Dean of Student Affairs, NIT Nagaland, Dr. Rosang Pongen-i ashi.

Parnok ya June 15-19 anogotem NIT Raipur nung sentong balala nung shilem agitsü aser June 20 nü meyipa shilangtsü. Kasa mapang Chhattisgarh nungia kaketshir 42 den tesayur pezü June 15 nü state tonga arutsü aser NIT Nagaland nung amungtsü.

Ek Bharat Shreshtha Bharat Yuva Sangam ya Ministry of Home Affairs, Ministry of Tourism, Ministry of Culture, Ministry of Information and Broadcasting, Ministry of Youth Affairs and Sports aser Ministry of Development of North Eastern Region lungjemer ayongzüka alitsü.

Dimapur nung mejangjabanisung tasü mang ka ngutet

Dimapur, Aami/June 12 (TYO): Arishi küm 60 shi tain nisung (non-local aser tebur) tasü mang ka PAB Dimapur anasa Flyover Blue Hill Station teküboklen nguteta lir ta June 11, 2023 anepdang 7:30 ako meta Dimapur nüburtemi East Police Station dangi telephone ajanga aru. Iba osang angashiba sülen East Police Station duty party tem tasü mang aliba tesemi ao aser tasü mang reprangshimba mapang tim masüba mapa inyakba mongutet.

Iba tesem nung ozüing agi melaba maparen ajak tembangba sülen post-mortem examination atema tasü mang ya District Hospital morgue nung yua lir.

Iba nisungba ya long pant sentsü temoro, tula sentsü tanen, temerem aser tenenya raporasa semer liasü.

Kibur/kinunger/tembar temi Officer-in-Charge, East Police Station, Dimapur den Mobile No. 7085055020 ajanga tongteprateptsü akok.

NSCN/GPRN ajanga asü khu lemsatep

Dimapur, Aami/June 12 (TYO): Wung Tangkhul Region (WTR) kübok Mailiang village nungi Lieut. Col. Retd. Vareso Machinao, Member, Steering Committee, NSCN asüba atema tejashi lemsateper, ta NSCN/GPRN sangdong ka ajanga ashi.

Pa ya mapang talangka shiranga arur June 7, 2023 nü asü. Pa linük tenzüka wadang nung 1992 küm dena liasü.

Pa tasünü tashi Naga nunger asoshi anokshitsü makokba tanüla nung akang-akanga nokdaka liasü.

Pa asüba ajanga tawa adokba asüngtsü tasak asütsü. Pai Naga linük asoshi bendanga agütsür tenzüka atema pa tenüng Naga nunger puti otsü nung teti alitsü.

NSCN ajanga mangyimer kibong aser kinungertem den asü khu lemsateper aser Tulusang Tsüngremi parnok nem tashi tasen agüjang ta sarasademtsür. Asür Lieut. Col. Retd. Vareso Machinao tanüla teti tatem maka tesunep nung anisüngzükjangma, ta NSCN/GPRN sangdong ajangasa ashi.

State nung Nagaland Lottery semzü kogo



Dimapur, Aami/June 12 (TYO): Tang mezüngbuba Nagaland State Lotteries-i ajungkettsüba "Dear Lottery Tickets" Hombarnü Golaghat Road, Dimapur nung aliba office nung semzü kogo.

Future Gaming and Hotel Services Private Limited nungi S Nagaraj, shiba Nagaland atema distributor lir, pai ashiba agi, state nung lottery ticket ayoktsü mela aliba tesem nung Nagaland State Lotteries indang office ajanga Nagaland State (conventional) paper lotteries ayoktsü Government of Nagaland-i iba firm ya shim.

Dear Lottery Tickets ya hopta shi, ita ana nung khen aser benjongbentsü mapang bumper lotteries densema scheme balala nung ayoktsü, ta ashi.

Weekly lottery tickets kübok anogoshi asemben asayatsü. Mezüng jenjang angur nem sen crore ka agütsütsü aser ticket sen trok (6) dang alitsü. Sen

crore ka den külemi ano danga senpet aika lir.

Item ticket asayaba ya YouTube nung live sayutsü aser result ya www.nagalandlotteries.com, www.lotterysambad aser www.dhankesari.com nunga reprangtetsü.

Nagaland State Lottery ticket tem ya West Bengal, Maharashtra, Punjab, Sikkim aser Meghalaya state tem nung ayoker.

Dear Lotteries ajanga April 2019 nungi April 2023 tsüngta crorepati 2281 adokdaksüogo, ta Nagaraj-i ashi.

State lottery tickets ayokba nungi GST revenue aruba ya state aser central sorkar asoshi teyari tulu kumogo. Lottery category ya 20% GST component küboki aiter aser Nagaland nung Dear Lottery ayokba nung ajemdaker Nagaland state GST income arutsü.

GHS Burma Camp nung World Day Against Child Labour amung



World Day Against Child Labour amungdang Government High School, Burma Camp nungi kaketshir temi Nipun Bharat Theme song atenba noksa nung angur.

Dimapur, Aami/June 12 (TYO): Community Education Centre Society, PM POSHAN (MDM) aser CHILDLINE 1098 lungjemer Government High School, Burma Camp nung World Day Against Child Labour anogomung munga liasü.

Iba sentong nung District Coordinator Lozau Kape-i tanurtem temeden aser teinyaktsü balala indang onük nung jembia aser Child Labour

samatsütsü asoshi koba yimya nung shilem agitsü, item indang shisa lemsatepa liasü.

Laisa Dimapur aser state nung ki mapa nung yariteper, longruba tesem aser kisü-jensüba, dokan aser gari yangluba tesemtem nung tanurtemi timtem balala ajurubatem indanga lemsatepa liasü.

Ano lai ozüing nung aibelenertem merenshitsü aser ketdangtsür nem ozüing nung

aibelenba indang osang agütsütsü indanga ashi.

Iba sentong nung GHS Burma Camp nungi kaketshir temi Nipun Bharat Theme song aten, CEC School kaketshir temi Child Labour indang skit ka agi shilem agia liasü. Sentong nung Headmaster, GHS Burma Camp ajanga melepzüing o jembia aser Headmistress, CEC School, Kenny ajanga sarasadema sentong tembang.

June 15 nungi Hyderabad nung G20 Agri Minister tem senden amentsü



June 12, 2023 nü Varanasi nung G20 züngsem linüktem nungi Development Minister tem senden nung Ato kilonser, Narendra Modi-i video conferencing ajanga jembidang tangokba noksa nung angur.

Hyderabad, Aami/June 12 (Agencies): G20 züngsem linüktem nungi Agriculture Minister tem senden June 15 nungi June 17 tashi Hyderabad yimti nung amentsü, ta Hombarnü Union Tourism Minister, G Kishan Reddy-i metetdaksü.

Hyderabad nung osangbenertem den jembidang Reddy-i, tamalen agriculture working group senden asem Indore, Chandigarh aser Varanasi nung menogo, aser tatembangbuba sendenji yangi Hyderabad nung amentsü, ta metetdaksü.

India dak alia tanga linük 29 nungi minister tem aser kettangsertemi Agriculture Minister tem senden nungji shilem agia adentsü, ta pai metetdaksü.

G20 züngsem linüktem-Argentina, Australia, Brazil, China, Canada, South Africa, Indonesia, Russia, Saudi Arabia,

Turkey, United States aser United Kingdom nungi kettangsertem iba senden nung adentsü. Iba dak alia iba senden nung adentsü jaokba linük 9 rongnung Bangladesh, Egypt, Mauritius, Oman, Nigeria, Spain aser Vietnam nungi kettangsertem iadentsü, ta pai metetdaksü.

"Linük 29 nungi agriculture minister tem aser tongti kettangsertemi Hyderabad nung ayongzükba senden nung shilem agia adentsü. Iba senden ya June 15 nungi 17 tashi akatsü," ta pai metetdaksü.

Linük 29 dak alia International organisations 10 nungi lenirtema iba senden nung adentsü. Anogo asemnü senden nung jembitsü tongtibang onüktem rongnung chiyungtsü security, sustainable agriculture, tetsürtem lenisüba nung aluyimba tsütsü terenlok, aluyimba den biodiversity aser climate change tsütsülen nungi

tayongzükba balala ajuruba koktettsü atema agriculture sector nung temelenshi onüktem densema lir.

Union tourism minister-isa, G20 Tourism Minister tem senden-a Goa nungi June 19, 20, 21 aser June 22 anogotem nung amentsü, ta metetdaksü.

Srinagar nung kiralongrar telok balala nungi amokmeren aliba den külemi iba senden Srinagar nung ayongzükba atema Pakistan-i ashishiaka tasembuba G20 tourism working group senden Srinagar nung takok ngua kaogo, ta pai metetdaksü.

G20 Tourism Minister tem senden nung 'Goa roadmap' ta ser tourism tsütsü bangzüng ka renema sangdongtsü, ta paisa metetdaksü.

Tatembangbuba Culture Minister tem senden July 24 nungi July 26 tashi Varanasi (Uttar Pradesh) nung ayongzükba akatsü, ta paisa shisem.

June ita tashi nungbo China nung India nunger journalist kata malitsü

New Delhi, June 12 (Agencies): Tang China journalist ka dang anünga lir, ajisüaka tan ita tatembanglen tashi nungbo China toktsür oang, ta tuyuogo.

Hombarnü China-i, India nung aliba China nunger journalist tem India-i bendangshidanga züngshir aser mejungi benshir, ta tai tongloktsü.

Tang China nung inyaker India nunger journalist ka dang anünga alisangji Press Trust of India (PTI) atema inyaker, ajisüaka China kettangsertemi pa indang visa 'renew' mesütsüba ajanga tan ita tatembanglen tashi nungbo pa meyipa arutsü.

2023 küm tetenzüklen tashi nung China nung India nunger journalist pezü liasü, ajisüaka April ita nung journalist ana China-i meyipa aotsü memela.

Tanüngba journalist ana rongnungji ka visa tembangba sülen June 11 nü China nungi meyipa aruogo, aser tesüsububa journalist ji June ita tatembanglen tashi nung meyipa arutsü. Anungji

tanabuba, China nung India nunger journalist ka dang malitsü.

Hombarnü China foreign ministry otongdar, Wang Wenbin-i, India nungbo China nunger journalist tem mejungi züngshir, ta aija liasü.

Wang-isa, 2020 küm nungi tenzüka India-i China nunger journalist tem visa magizüker, ibayongji India nung China nunger journalist 14 aliba nungi tangbo ka dang anüngogo, ta metetdaksü.

Iba dak sendakba nung India sorkari, India nung China nunger o s a n g b e n e r t e m sademsadema dang inyaker, ajisüaka China nung India nunger journalist tembo yamaji meinyakteter, ta ashi.

Taoba ita India-i Shanghai Cooperation Organisation (SCO) foreign minister tem senden atema China nunger journalist tem nem temporary visa agüja liasü.

Indian foreign ministry-i, India-i bendanger journalist ajak linük nung inyaksü melar, anungji China-ia yangji India nunger journalist tem melatsü imlar, ta metetdaksü.

Cyclone Biparjoy atema PM Modi-i senden ayongzükba amen

New Delhi, Aami/June 12 (Agencies): Hombarnü Ato kilonser, Narendra Modi-i tongti kettangsertem den senden ka mena Cyclone Biparjoy atema terenemshiba jenjang asadangogo.

Brihostibarnü iba cyclone ajanga Gujarat kübok Kutch region kongshitsü.

Modi leniba nung amenba senden nungji Union home minister Amit Shah, principal secretary to Prime Minister PK Mishra, cabinet secretary Rajiv Gauba, Earth Sciences secretary M Ravichandran, National Disaster Management Authority nung züngsem Kamal Kishore aser

Meteorological Department Director General, Mrutyunjay Mohapatra nunger aden.

Hombarnü India Meteorological Department (IMD)-i, Biparjoy cyclone ya ano kanga tesashiba kümogo aser north-northeast tsütsüleni aontsü, ta metetdaksü.

IMD-isa, June 15 anüngdang tashi nung iba yipru tesashi ya Saurashtra aser Kutch anasa aliba Pakistan nunger tzüyimkümlen Mandvi (Gujarat) aser Karachi (Pakistan) tsüngda tzüyimkümlen atongtsü aser iba mapang nungji mopungji ghonda ka nung kilometer 125-135 nungi

150 tashi kera aontsü, ta metetdaksü.

Tesüiba ghonda trok tsüngda iba yipru ya ghonda nung kilometer tenet kera aon aser northeast Arabian Sea nung north tsütsüleni ondar. Hombarnep 8:00 ako nung iba yipru ya Porbandar nungi kilometer 320, Devbhumi Dwarka nungi kilometer 360, Jakhua Port nungi kilometer 440, Naliya nungi kilometer 440 aser Karachi (Pakistan) nungi kilometer 620 pilar liasü, ta IMD-i metetdaksü.

Kümzükba maparen inyaksü asoshi yipru süitsü aliba regions aser yimtitem nung Disaster management sepaitem lemzütsüiogo. Iba yipru ajanga Pakistan kübok Karachi aser India nung Gujarat kübok Mundra aser Kandla na kongshitsüa akok, ta asadangtetogo.



June 12, 2023 nü Jabalpur nung Congress General Secretary Priyanka Gandhi Vadra-i lokti senden ka nung jembidang tangokba noksa nung angur. Kasa noksa nung taoba mapang Madhya Pradesh nung Chief Minister, Kamal Nath-a angur.

SBI State Bank of India
STRESSED ASSETS RECOVERY BRANCH, JORHAT
 Na-Ali, M G Road, Jorhat, Opp. ASEB Building, PIN-785001 (Assam)
 Tel No: 0376-2300193 / 2300204

Appendix - IV-A
 [See Proviso to rule 8 (6)]
KIOJEN AYOKTSÜ ATEMA SALE NOTICE

Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 nung Rule 8(6) kübok kiojen ayoktsü atema E-Auction Sale Notice.

Public aser talisa sen apur(tem) aser Guarantor(tem) dang iba sangdong agütsür, Secured Creditor dang mortgage/charge asüba tsünglanglen shia aliba kiojen State Bank Of India nung Authorized Officer-i agiadokogo, aser iba kiojenji "Kong koma ali", "Koma lidir yamaji" aser "Yangji aliba ajak" **15.07.2023** nung ayoktsü, 14.01.2021 anogo tashi nung Rs. 65,46,701.00 (Rupees Sixty Five Lac Forty Six Thousand Seven Hundred One only) alanzüktsü atema kiojen agiogo, iba denji külemi sen tetemlok, cost, charges aser tanga teindokba balala adentsü aser ibaji M/s. S. Angami Hardware, Proprietor: Shri Mezhusezo Lhoungu aser Guarantor: Shri Zakiesatuo Lhoungu dang nungi secured creditor-i agütsü. Reserve price ji **Rs.1,61,75,740.00** asütsü aser earned money deposit ji **Rs.16,17,574.00** asütsü.

Kiojen osang tongmelang agi
 Property ID: **SBIN400012443483**

GB/C-H/No.110-B, Bank Colony, Opposite Super Market (Naga Shopping Arcade), Dimapur, Nagaland anasa Dag No.184 of Patta No. 202 nung Shri Zakiesatuo Lhoungu tenüng nung aliba kimong tasazük 01 Bigha 00 Katha 00 Lechas aser yangji aliba kiojen ajak.

Bounded:
North tsütsülen: Duosanyu'er kimong, **South tsütsülen:** Medical Store, **East tsütsülen:** Approach Road, **West tsütsülen:** Fishery Pond.

Iba sale dak sendakba telatetbatem aser osang tejangja ajak State Bank of India, secured Creditors website nung agüja aliba link nung angutsü :
<https://sbi.co.in/web/sbi-in-the-news/auction-notices/sarfaesi-and-others>
https://ibapi.in/Sale_Info_Home.aspx

Anogo : 12.06.2023
 Tesem : JORHAT

Authorised Officer,
 State Bank of India, SARB Jorhat

SBI

CAR MELA !!!1 CAR MELA!!! CAR MELA!!!

DATE: 14TH-15 JUNE VENUE: IMKONGMEREN SPORTS COMPLEX
 DISCOVER THE LATEST CAR MODELS AND EXCITING FINANCING OPTIONS .

DONT MISS THE OPPORTUNITY TO EXPLORE A WIDE RANGE OF CAR MODELS AND AVAIL ATTRACTIVE FINANCING OPTIONS . JOIN US FOR AN UNFORGETTABLE AUTOMOTIVE EXPERIENCE.

Date: 14th - 15th JUNE
 Time:9.00 AM to 4.00 PM

Venue: Imkongmeren Sports Complex
 FOR MORE INFORMATION, CONTACT:

1. 8132878449 , W.Onesimus , CM(SBD) RBO Mokokchung
 2. 9862299585 , Lanuienla Walling, Manager RBO Mokokchung
MAKE YOUR CAR DREAMS A REALITY AT THE CAR MELA!!
 Organised by - SBI RBO MOKOKCHUNG



TIR YIMYIM YIMOBILEM (EDITORIAL)

DIMAPUR SANGTENNÜ, AAMI (JUNE) 13, 2023

Manipur asoshi yimjung

Manipur nung kin o kin na tsüngda lendong tulu ataloker joko ita ka ser tasadang ajunger saka tensa mapang mesüngjemteter aser tetsübu agi sünga lir. Kar pei ki rongdoker talidak maka aser kar tetsübu agi pei kidangi moutet nisung meyrirjang tenem dak tema government-i lapoktsüba relief camps 350 nung nung lidagi. Ashiko, relief camps nung alirtem dang nungi teimba tesem balala nung pei tsürabur, adianu aser kinungertem kidang jenoka alitsüa akok. Iba ama tetsübu tatenden agi sünger aliba mapang ka center government-i yimjung luden ka shimbaji mapa shitak ka inyakogo, kechiyong iba ama kin o kin na tsükchitepba mapang tiyongtsü nung yimjung yanglur nungdaker. Ajisüaka, yimjung bushitsü atema shimba committee nung angh mendenbuba ser Chief minister dena shimokbajiang shisatsü agi matong inyakogo ta bilemer. Manipur nung governor aser Chief minister nati temzüng ozüng shitak amshiteta yimsü sütet nungbo tang Manipur nung azü tokshi lendong pateka ya matalokla aser yimjung luden ka shimtsüsa mekümla. Aji oda, tenati tensa mapang junga mazüoktetba ajanga tenati yimsüsüba yimli nung nübortem tsüngda azü tokshia raratepdaktsübaji tangari tena maitsüyonga tenasasa tanati tena aija bilemtsüla. Ajisüaka, tenasasa pei menden nungi alutsü melen tenati anir yimjung bushitsü shimbajibo yimjung meyutetba nisung nem yimjung bushidaktsür asütsü. Tang Manipur nung atalokba lendong yabo linük nung kecha tesem nunga atalokdanga mangashi aser mangu. Atangji, tamalena Manipur aser tang state-tem nung aiben nübortem rongnung azütokshia raratepba aser kiojen raksatsüba lendong indang angashiogo aser ajangshiogo saka tang Manipur nung nübortemi police-tem ket nung akaba prangpong injang meyrirjang dak tali rakzüka bener orr amshiba lendongjibo, ashiko, linük nung mezüng ataloker asütsüa akok. Aji oda, lendong pateka nungji police-tem ket nung akaba hadir ajak rakzüka bener odaktsür nübortem tsüngda raratepdaktsüba tamakok dang nungi tuluba state ka asoshi malitsü. Shitakba agibo tang yabo Manipur yimjung asoshi 'President's Rule' agütsür alitsüla aser President-i repranga Manipur lima yimjung asoshi shitakba yimjung yanglurtem shima inyakdaksütsü nungdaker. Ajisüaka, tang center government-i shimba yabo yimjung yanglurtem masü saka yimjung raksadaksürtem bushia shimba amai lir, anungji iba "Peace Committee" yagibo yimjung mebushitetsü. Yimjung bushiba mapasa asüyonga tang Manipur nung yimjung bushitsüba mapa yabo alima kin ana tsüngda yimjung bushitsüba mapa dang nungi kanga agia tasakba asütsü. Iba yabo tangar o tangar na tsükchitepba lendong mapa ka masü saka kasa sensosanger aser adianutem rongnung kati ka taküm mapayutepi inyakba mapa ka lir. Iba lendong nung nisung noklang dak tema tepsetogo aser tasü taküm tsüngda nisung aika mozü kidang lir. Joko, kodanga pei kidangi aser pei mapa inyakdagi aser pei zünga alidak kaketrejui moutettsüsa nisung aika taküm aser kibong nung takoksa tulu ajurua lir. Atangji, item atemaji yimjung nungdaker. Ajisüaka, Manipur asoshi yimjung nungdakba yabo balaka, kechiyong joko tang reliefs camp nung alirtem o malirtem na akhi ama yimjung nung külemi tesem ka nung tangsa tangbo melitetsü, mapa inyakdaka tesem ka nung meinyaktetsü aser külem kaketrejuia moutettsü. Manipur nung tang tashi government office-tem shitak moutetter aser bank dena aika shibanga lir. Aji oda, Manipur nung yimjung arutsüba lenmangji taidoktepba kisüng agibo marutsü. Tia tamajungtibaji, nisung aika atema yimjung mechi tai adokyonga taodak aser talidak makatsü. Iba tia nung alima nung nisungi kodaser yimjung aser tesünep nung litetsü? Atangji, yimjung malidak yimjung bushitsütsüba yimten, arogo aser lokti lenirtem mapa, anungji yimjung mangu tashi bushitsüla. Ajisüaka, yimjungji yimjung meimertemi bushi nung dang angutsü. Anungji, Manipur atema yimjung bushiba mapa ya Manipur government-i masü saka government nung malir, Manipur tia meteter aser Manipur lima meimertem nem bushidaktsütsüla.

OLEMSABANG

LOKTI-TENTET ALIBAJI TAJUNG SAKA TALI MEDENTETTSÜLA

- L.Kika Pongener

Asen mimchir ya lipokdang nungi kija masü, saka telok külem külemi longjemer lia aruba shilo ka lir. Asen Ao kin ya-a Chungliyimti lima nungi sobaliba-a lia arudang lokti longjemer lia aruba kin ka lir. Yamaji lokti külemi longjema aliba ajanga mapa tasak tamakoktsü ajunga takok ngua inyaka aru. Alu talen lenmang aser aien lenmang yimer ajak külemi longjemer api, yim tzüpo külemi longjemer mesem aser yim among sungküm külemi longjemer meruka inyak. Iba sobaliba nungji ajemdaker, otsüla oboula nunger kodang yim tasen ka akümstsü apusodir, kin ka, kidong ka kija masü saka kin kidong tabensa ayongteper apuso, kechiaser yimtsüng ka kodang kümteta odir, idakji yimden yimli aser loktiliba balala tenteta, kibalembua sobaliba-a lia aotsü asoshi itemji kanga tongtipang ta parnoki angatet. Yamaji kodang yimtsüng ka tenung jateta kümteta odir, idakji kiyong-kiyong telemsa kümteta aor, kiyong ishika longjemba nungjagi mepu ka akümer, mepu ishika longjemba nungjagi yimtsüng songjen kaji akümer. Yimtsüng ishika longjemer tsükong ka akümer, tsükong ishika longjemer kin ka akümer aser kin ishika longjemba nungjagi linuk ka 'Nagaland' ta tenung jateta akümer.


Ano yimtsüng ka nungji tetsür-tebur pei pei zünga züngaren tenteta lir, iba züngaren nungji telemsa ana lir, kaji alu zünga, alu yangtepa inyaktsü atema tentetba telok. Aser tanga züngaren kaji sungpo zünga, ibaibo yimden yimli tetenzükdak tongtipang ka lir. Tebur ka kodang nubujunga kümdir sungpoi ayir, aser kodang sungpoi idir, sungpoi ayiba küm nungjagi tenzüka aroju nung ayiptsü, aser küm pungo iba sungpoji apur külen, kodang sungpor nungjagi jentetdir, iba anogo nungjagi pa yimrong nung senso ka ama züngoka, yimden yimli maparen ajak nung senso tajung züngsem ka ama shilem agitsü tenzüker. Iba kasaji tetsürtema kodang nubujunga kümdir pei pei kin yilangtsür amitsür kidang adenshia ayiptsü, aser tebur parnok züngapurtem sungpoi ayiba mapang parnoka yilangtsür rongi ayitsü. Yamaji yimtsüng ka nung yimden aser arogo, iba lokti tongpen ana dak sendaka telok tentet aika lir. Aji oda, yimden aser arogo dak sendakba telokjibo yimtsüng ka nung akatsüba aser nungdakba lokti-tentetem lir, kechiyong item lokti-tentet yabo sobaliba aser tamangba den sendaktepa lir.

Ano item dakji alaka, tanü alima tejakleni aoba den, tanü tensai bentsür aruba lokti-tentet aika tenteta lir... Co-operative Society, Self Help Group, Farmer's Club, Cultural Club, Pensioner Union etc. Yamaji telok-tentet aika tenung jateta tenzüka lir. Item lokti tentet ajak nungji saru molok aser nubotsük dena lir. Lokti-tentet aika nubur nem tajangzük agütsüba telok lir, saka ano karbo tajangzük magütsüba aser kibong sensak tiai yidaktsüba teloka lir. Anungji akok ka asünungbo lokti-tentet ya kangara talila metenzükang tajungba asütsü, kechiyong kibong ka nungi dang lokti-tentet ajunga nungji saru molok atoker aser nubua atsüker. Telok tenji balala senden (Meeting-Sitting) aiben alitsüsa akümer, mongdang-mongchi (Jubilee/Convention) alitsüsa adoker, aser item ajak nungji khangtepa saru sarur, aser aluyimertem balaka kibong mapa/alu mapa inyaktsü mapang madoker, ibajagi kibong aika sensak adener, aser kodang kibongtem sensak dendir, idangji memeteti alima sensak tiai ayir.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Arogo lenirtemi televangelist, Pat Robertson nem akhüm agütsü



Pat Robertson

June 12, 2023: Arogo lenirtemi social media ajanga televangelist aser Christian Broadcasting Network (CBN) tentetsang, asür Pat Robertson nem akhüm agütsür.

Pat Robertson ya Brihostibarnü (June 8) arrshi küm 93 lia asü.

1960 küm Robertson-i CBN tenteta liasü. Paisa Operation Blessing, Regent University, International Family Entertainment, The Flying Hospital, American Center for Law & Justice (ACLJ) aser The Christian Coalition tenteta liasü.

Pa asüba sülen Arogo lenirtem aikati social media ajanga pe nem tetushi aser akhüm agütsüdar.

Shadow Mountain Community Church nung pastor, Dr. David Jeremiah-i sangdong ka ajanga, "Taochi aser temeim aketba kilir Yisu den alitsü atema ogo. Ni Pat metettsüsa maongka angu. Pat-i pai ajuruba nisung ajak nem Khrista temeim aser tekümtet metetdaksünüa liasü. Pa tasütait nisung liasü aser pa

dak aliba sempet aika amshia pai Tsüngrem yimli tenzük," ta lemsatop.

Paisa, "Pa kanga menungratsü, ajisüaka pai alima tesem ajaklen osangtajung prokba senmang maneni alitsü. Iba atemaji Tsüngrem nem tenüngsang agütsür," ta lemsatop.

Murfreesboro, Tennessee nung aliba World Outreach Church nung pastor, Allen Jackson-i, "Robertson ya tasütait lenir la liasü. Pa tamang nung tashitait liasü aser mangdang tulu yur inyakba ajanga CBN aser Regents University senmang yutsü. Pa dak ajemalu tashi liasü aser iba ya asenok ajak asoshi Laishiba tsütsülen nungi anguba shisatsü lir. Pa kanga menungratsü," ta metetdaksü.

Pray.com yarisema tentetsang, Matthew Potter-i, "Christian Broadcasting Network tentetsangi sabang tuluka yangerttet, aser ibaji ajanga pei tamang jenjang tajungba akümtsü atema nisung million aika nem tashi agütsüogo. Yamaji tanü-a ibaji

ajanga asen putu nung technology balala amshia inyaksü atema Pray.com nung inyakerkem-a ajungmesor," ta lemsatop.

"Asenoki Pat Robertson nem akhüm agütsüba den külemi asenoka ajaki kasa jenjang nung nendaka inyaksü tezüngzüktep agidi," ta paisa ayongzük.

Pastor aser sayutsünger, Franklin Graham-i, Robertson ya pa atema tembar ka aser tebu ka ama liasü, ta ashi.

Samaritan's Purse nung tongti, Franklin Graham-i, "Pat Robertson ya küba (Billy Graham), ni aser onok ministries atema medemer tajung ka liasü. Pa kodaki ogo. Kodak ya atangji lir aser Tsüngrem den Par jabaso Yisu Khrista dak amangertem-a ajak kodaki aotsü. Ni Pat kanga menungratsü, ajisüaka kenü anogobo ni pa ajurutsü, ta ni tejangja meteta lir," ta lemsatop.

Brihostibarnü (June 8, 2023) Robertson asüba osangji pai tenzükba CBN ajanga metetdakja liasü. Küm aika "The 700 Club" ketdangüsü agisang, Robertson 2018 küm nunga stroke süa liasü.

Pa 1930 küm March 22 nü Lexington, Va. nung aso aser kibong nung jabaso ana rongnung tanubosang liasü. Tetsü, Gladys Churchill Willis-i Tsüngrem bendanga tenzüksü atema pa ajungshia liasü. Yale nung pai nursing student, Adelia Elmer ajuruba sülen 1954 küm tena kibong aküm aser tena tanur pezü-Timothy, Elizabeth, Gordon aser Ann nunger sosema lir.

ANOGO ABEN TSÜNGREM DEN

Ne Temulungjang Jenjang Kechi? (T.Ken 108:1-13)

"O Tsüngrem, kü mulungjang akangakanga lir; ni kongki atemtsü aser ken atentsü." Dawidi iba ken Khristan taküm temulungjang akangakanga alitsüba nungi tenzük.

Temulungjang takangji kechi? Iba yagi tekümetet asoshi Kibuba dak amanger. Yisu asenok asoshi kangki nung asü, aser Pa dak amanger. Asenok temulungjang Pa dak sendakloka alitsü aser asenoki Pa taochi metettsü. "Kechiyong ne yimlibilem anüng tonga tulu lir, aser ne atangji agi mepettem atonger" (t.4).

Temulungjang takang kaji bendanga agütsüba temulungjang. Asenoki kibur ana metenzüktet ta Yisui ashi. Asenoki ka meimtsü aser ka sempatsü mesüra ka tenzüksü aser ka toktsütsü. Asenoki Tsüngrem aser sen metenzüktettsü (Matt. 6:24). Aji asünung temulungjang takang

kaji bendanga agütsüba aser temeim temulungjang lir- Kibuba nem dang bendanga agütsüba temulungjang. Satiba ji Khristan taküm ka noksa Laishiba nung aiben amshiba angur. Shirnoki Khristaji pei Kümtetdakba ta amanger parnok Khrista den sati aser. Asenoki Kiyimsang kiyimla tani arutsü aser asenok kotaker kidangi aitsü atar. Iba mapang asenoki Kibuba nung temulung lemtetta atatsüla. Asenok tanela nung nüktapangta aibelen makai atatsüla. Kümtetdakba dak temulung melemteti malitsüla.

Temulungjang takang kaji tenzükba temulungjang lir. Ne mulungjang akanga lira tangar tenzükba nung na mazüangi alitsü. Kibuba nung temulungjang akanga aliri tangar tonga oa tenzük- tangar tama sūdaksür.

Tatamsa, temulungjang takang kaji teimla temulungjang lir. Asenoki Kibuba arutsü yongyar. Kodang nai kar meimdir, pa/la den alitsü nai yongya atar. Kibuba madang kodang asenok alitsü asenoki teimla nung yongya atar.

Nübusen ka temulungjang jagi pa/la jenjang jungkai adoktsür. Temulungjang takang kati Kibuba den lungjema alir, amanger, bendanga agütsür, tenzük, yimlar. Ne mulungjang jenjang koda?

Chhattisgarh state nung tribal Khristantemi longkak ait

June 12, 2023: Taküm küm tatemanglen assembly elections agitsü aliba Chhattisgarh state nung telok kari tribal Khristantem ST list nungi agientsü mepishiba anema tribal Khristantemi longkak aitogo.

June 10, 2023 nü state yimtiba, Raipur nung tribal Khristan noklang aika adenshir yimyim ayima longkak aita jaja.

Hindu nunger telok kari sorkar mapa aser shisaliok rejutem nung admission atema tribal Khristantem nem reservation agüja aliba ya agientsüla, ta takhangba agütsür.

Tribal teloktem ya Scheduled Tribes nung züngoka lir, ibaji ajanga sorkar tajangzük balala angur.

Hindu nunger telok kati,

Khristan yimsü agizüker tribal yimsü aser sobaliba sülen manidakba tribals nem Scheduled Tribe (ST) nisungtem nem agütsüba tajangzük balala magütsütsüla, kechiyong parnoki akhi yimsü aser sobaliba toktsüogo, ta ashi.

Osangbenertem den jembidang longkak aitba sentong ayongzük rongnung ka, Anil Kispota-i, "Ozü tzüraburtem tribal liasü, anungji onok maneni tribal sa asütsü," ta ashi.

Tribal Khristantem jagi sobaliba sübotsü sübor Science College ground nung adenshi. Longkak aitba sentong ya Chhattisgarh Christian Adivasi Mahasabha (Chhattisgarh Christian tribal forum)-i ayongzük liasü.

Taküm April ita nung Jaipur nung Janjati Suraksha Manch (tribal protection forum)-i sentong ka ayongzük, "Akhi

tribal yimsü aser sobaliba sülen manidakba tribals nem Scheduled Tribe (ST) nisungtem nem agütsüba tajangzük balala magütsütsüla," ta takhangba agüja liasü.

Iba forum nung convenor aser taoba mapang state minister Ram Bhagat-i, Janjati Suraksha Manch-i akhi tetsü-tebou yimsü, sobaliba aser oshi wazüka ayutsü atema inyaker, ta ashi.

Nütsüng million 23 aliba Chhattisgarh state nung nütsüng shilem 98.3 jungnüabo Hindu nungertem lir, nütsüng shilem 1 Muslim nungertem lir aser Khristantembo shilem 0.7 dang lir aser Khristantemji teimbaka tribal nisungtem lir.

Kispota-i, Khristan yimsü agizüker tribal tem nem sorkar tajangzük balala tagütsü, ta

takhangba agütsüba ya loktiliba nung mangatettep adokdaksütsü nükjidong nung inyakba lir, ta ashi.

June 12, 2023 nü osangbener den jembidang Catholic Bishops' Conference of India (CBCI) Commission for Tribal Affairs secretary, Nicholas Barla-i, tribal Khristantem ST list nungi agienra parnoki tajangzük balala mangutsü, ta ashi.

Tanga yimsü dangi meyiper tribal nisungtem ST list nungi agienba ajanga yimtenren nunga temelenshi adoker, kechiyong Sarguja ama tribal nütsüng aika aliba regions nung 2018 küm assembly elections nung nütsüng teimbakati opposition Congress nem vote agütsüba ajanga Congress-i takok ngua liasü.

Taküm küm tatemanglen Chhattisgarh nung assembly elections agitsü lia Janjati Suraksha Manch (JSM) leniba nung Hindu nunger telok kati tribal Khristantem ST list nungi ageintsü takhangba agütsür. 2006 küm tentetba JSM ya BJP aser RSS-i pusemer.

June 12 nü osangbener den jembidang tribal Khristantem temeden atema inyaker, Binay Ekka-i, "Iba mapatong ya kin aser yimsü nung ajemdaker tribal nisungtem tsüngda telemsa adokdaksütsü nükjidong nung inyaker," ta aitsü.

Ekka-isa, "Khristan missionary temi tribal nüburtem ajungkettsütsü atema inyaker, ajisüaka JSM-i Khristan missionary temi yimsü meyipdaksür, ta tai tongloksür," ta metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Raok

(adv) kanga jashia bilem (emotionally very hurting)

* Medemeri ashioxtsübabo kanga **raoka** bilemer.

Raok

(adv) oset mesüra nisung agi laktetba (get fed up of)

* Ozü ki anasa aksü menemba agi kanga **raokogo**.

OLONG PAITEP # 6544

1			2		3		4	
			5		6		7	
8								
			9					
	10							
							11	12
			13				14	
15						16		

TIPILEN

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T _ _ _ lu - (3)
- 10. Takdang temalen - (9)
- 11. Tesa _ _ _ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

LANGTSÜNGLEN

- 1. Reprangdaksü - (4)
- 2. _ _ _ ur - (3)
- 4. Kiojen yangludak - (6)
- 6. _ _ _ _ _ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemetdak - (6)
- 12. _ _ _ _ adenshi - (4)
- 14. Tsünusenbongsü adokdak - (3)

OLONG PAITEP # 6543 TELANGZÜBA

TIPILEN :

- 1. Kasa, 6. Rangben,
- 7. Mait, 9. Poktet, 11. Ati,
- 13. Atasa, 16. Rür, 17. Rajang,
- 20. Lanu, 24. Nüngjem,
- 25. Süra.

LANGTSÜNGLEN :

- 1. Khu, 2. Süjak, 3. Onük,
- 4. Oba, 5. Anü, 6. Ratet,
- 7. Mozü, 8. Ita, 10. Tar, 12. Tinu,
- 14. Salem, 15. Aja, 18. Anünü,
- 19. Taju, 21. Ano, 22. Onü,
- 23. Kua.



**WARAKLAI AINLEN NUNGI TAMBU DEN
TEMOLUNG MALEM JEMBRIR :**

Warakla : Tambu na kidang südi? Süra grinder ji khen start hangjong. (Krrrrr krrrrrr krrrrr), good. (Next day)

Warakla : Tambu tanüa grinder ji khen start hangjong. (Krrrrr krrrrrr krrrrr), good. Tasemnepjia kasaji inyaker Warakla kidangi ajungben shilanger.

Warakla : Talak, nebu kong lir?

Polokba : Oja, obalaji anogo asemnü buba kidangi meshilangi grinder machine to apur senzüdar kodi!

Warakla : Mekümteta!

~ Lilir : WhatsApp

Meghalaya district 7 nung drug addiction & trafficking kanga bulur



Shillong, June 12, 2023

(Agencies): Meghalaya sorkari district 7 nung drug addiction aser trafficking maparen kanga bulua inyakba bushitetogo ta Social Welfare Minister Paul Lyngdoh-i ashi.

Item district nung ozüing alema mozü achiba kanga bulur aser iba atema mapa inyaksü nüngdaker, ta pai ashi.

State sorkari ajitetba district temji- East Khasi Hills, East & West Jaintia Hills, Ri Bhoi, West Garo Hills, West Khasi Hills aser

South Garo Hills lir.

East Khasi Hills kübok Madanriting, Jhalupara, Laitumkhrach, Nongthymmai, Polo, Nongmynsong, Mawlai, Mawprem, Lumdiengjri, Iew Mawlong, Mawngap, Mawryngkneng aser Pynursla ya hotspots ta jangaogo.

Mozü achirtemi maitüsü balala amshia rehabilitation centres nung amongba ajanga mozü achir indang statistics shitak menguteter ta Minister Lyngdoh-i ashi.

Iba tebilemsü khuret atema

sorkari "Drug Reduction Elimination & Action Mission" (DREAM) project inyaker aser iba ya drug-free Meghalaya akümtsü atema lir ta paisa ashi.

Iba mapatong ya data collection shitak bendentetsü atema online aser offline platform nung inyaksü.

DREAM mission pusema sorkari budget nung Rs 5 crores lemsüktsüogo aser iba ya publicity campaigns aser awareness programs atema lir ta Minister Lyngdoh-isa metetdaksü.

Iba senden nung Director General of Police (DGP) Meghalaya, Social Welfare Department Director, Health Department aser Superintendents of Police (SPs) aden.

Senden nung Narcotic Drugs and Psychotropic Substances Act (NDPS) 1985 nung metokmeperi alibatem benoka lemsatep aser Meghalaya sorkari rules & regulations tajung kar latettsüla ta jembitepa liasü.

Manipur state-level peace committee nung COCOMI madentsü

Imphal, June 12, 2023

(Agencies): Centre sorkari state-level peace committee nung Coordinating Committee on Manipur Integrity (COCOMI) convenor Jeetendra Ningomba züingsem dendaksüba magizüker ta metetdaksüogo.

Manipur nung ozüing alema mozü shibelenba aser ozüing alema aruba khuret maziük tashi yimjung bener marutet, ta COCOMI-i ashi.

June 10 nü Centre-i state-level peace committee tentet aser iba nung mendenji Manipur Governor Anusuiya Uikey lir. Luden nungsa Chief Minister N Biren, MP, ministers, MLAs, CSOs aser COCOMI dena tanga teloktem nungi lennirtem

shimoka lir.

Jeetendra Ningomba dang masüngdangi luden nung pa shimok ta COCOMI-i ashir.

Manipur nung 'narco-terrorists' ajanga prangpong bener amaker anungji tang peace committee nung adentsü mapang shitak masü, ta COCOMI convenor Ningomba-i ashi.

Iba peace committee nung züingsem kari Manipur loksatsü maparen nung shilem agir, ta paisa ashi.

Manipur nung narco-terrorism tera nungi atsüdokba aser ozüing alema aruba khuret koktetba sülen ang yimjung angutsü, ta Ningomba-isa metetdaksü.

Sorkari India senso masüba 'narco-terrorists' anema mapa meinyakba atema jashir. Ano ozüing alema arurtem odang yutsüba ajanga tarutsü nung lendong bentsür arutsü, ta paisa ashi.

Manipur nung public convention ajanga 'War on Narco-Terrorism' sangdong aser iba anemertem ya Manipur nung narco-terrorism pusemertem ta ashitsü akok, ta Ningomba-isa shisem.

"Sorkari NRC maparen tekaraba nung inyaksüla kechiyong iba mapa ya inyakadoker lira tang ajurua aliba tensa ya majurui lila" ta COCOMI media coordinator Somendro Thokchom-ia ashi.

Golaghat nung arem shiti telok kati tanur ka tepset; 2 yirutsü

Golaghat, June 12, 2023

(Agencies): Assam kübok Golaghat district nung arem shiti telok ka adokdang tanur ka tepset aser nisung ana yirutsü.

Iba lendong ya Deobar aonung tesü Numaligarh town

kübok Shyamraipur tea estate nung atalok.

Arem shiti telokji chiyungtsü bushia aruba liasü aser idangji kiojen 50 tema raksatsü.

Iba lendong nung arishi küm 8 tain tebur tanur ka tepset aser

par tsüraburtem kanga mejungi yirutsü.

Iba osang angashiba sülen Assam forest department ketdangsurtem tesem tonga oa osang metetpela. Parnokisa tanubosang mang postmortem atema mozü kidangi bener ao.



Assam nung AMRUT project kübok gari lenmang yanglushiba maparen timi meinyakba ajanga lanur ka taküm samaba dak sendakba nung Dibrugarh police-i survey engineer-cum-pipeline supervisor ka puogo. Iba nisung ya Samir Sarkar ta jangaogo aser pa ya West Bengal nungi lir. Guwahati nung class XI kaketshir ka construction company-i atuba ongken ka nung tsüka asüba sülen public-i ola adoktsü tenzük. Iba company yagi safety protocols sülen manidaki tzü tajemtsü supply pipe alatsü atema lenmang tezülen tusa. (Dibrugarh, June 12)

Chechen sepaitemi Russia den contract zülutep

Moscow, Aami/June 12 (Agencies): Russia indang defence ministry ajanga Akhmat group of Chechen special forces den contract ka zülutep, koba Ukraine anüdoklen Donetsk region kübok Mariinka jila anasa Kremlin asoshi rarar.

Russia nung sen yong raraba Wagner group tekolakba Yevgeny Prigozhin-i iba amala contract züluteptsü memolungba sülen anogo ka lir iba osang ya Hombarnü angur.

Ukraine nung Moscow tenüng nung raraba jurila army tem aziüoktsü nükjidong nung Russia nung ozüng tasen ka nung iba shilem tasen ka lir.

Iba ozüng kübok "volunteer units" ajaki July 1 tashinung contracts züluteptsüla aser parnok linük indang Defence Minister Sergei Shoigu küboki aitdaksütsü.

Defence contract indang ozüngtem molunga agizükra volunteer fighter tema sepaitem dek sako teyari angutsü, ta Kremlin-i ashir.

Iba telok indang lenir Ramzan Kadyrov-i iba maongka agizükba sülen "Ibai kanga tajung amai bilemer," ta Akhmat commander Apty Alaudinov-i ashi.

Pai ashiba agi, tesüiba ita 15 tsüngta par teloki volunteers meyririjang aika anepalua renemer Ukraine-i yok.

Washington nung amenoka aliba Institute for the Study of War (ISW) osang ka ajanga ashiba agi, parnok iba rara nung adenba sülen Ukraine kübok including Mariupol, Severodonetsk aser Lysychanak yimitem densema yimti aika nung kanga sashia rara aru.

Saka ita tetenzüklen Russia indang Belgorod nung raraba tesashiba akumba sülen Kadyrov telok ya Ukraine nung raraba nung tongti shilem agitsü totuyuba agütsü amai lir, ta ISW ajanga ashi.

Hopta tatemlen Prigozhin-i Shoigu den ozü unit temi contract kecha mezüluteptsü, ta shia liasü.

"Shoigu-i military formations junga mazüokteter," ta Prigozhin-i audio message ka nung ashiba par press service ajanga Deobarnü prokshia liasü.

Wagner tekolakbai Russia indang defence ministry aiben aija aru aser parnok (defence ministry) Ukraine nung par sepai nem teyari peria magütsür, ta shia liasü.

Putin tembari video nung o

tamajung jembia Moscow indang mitkar lenir anema jembia liasü.

Kadyrov-i defence minister anema o tamajung mejembi.

Chechens den agreement zülutepta sülen tanüngba volunteer unit temia kasaji inyaka anidaksü imlar, ta Russia indang deputy chief of the general staff, Colonel General Alexei Kim-i ashi.

Ukraine-i meyipar rara tenzükogo ta sangdonger anogo ka lir par sepaitemi linük southeast tsütsü yimtsüng pezübuba, Storozheve tanaben agiogo ta ashi.

Parnoki Deobarnü yimtsüng asem tsükchir talenba nungi salaogo ta shia liasü aser item yimtsüng asem ya Zaporizhia region anasa Donetsk region tatemlen aliba Blahodatne, Neskuchne aser Makarivka alitsü.

Linük anüdoklen aser south tsütsü Russia nungeri amokbanga aliba tesemtem tanaben rakzüksü teimla nung Kyiv-i par sepai inyakyim indang ola madoki aru.

Russian military bloggers kari tang tashi Makarivka nung rarar saka Ukraine sepaitemi Blahodatne aser Neskuchne agiogo ta ashi.

Taoba Italy PM Silvio Berlusconi süogo



Milan, Aami/June 12 (Agencies): Taoba Italy Ato Kilonser shibai Italy nung yimden yimsüsüba aser sobaliba yanglushija liasü pa arishi küm 86buba nung süogo, ta pa otongdari Hombarnü metetdaksü.

Billionaire media mogul ya Hokolbarnü Milan nung mozüki kati anir oa liasü. Pa nem teyari agütsürtemi ashiba agi, pa leukaemia tashidak tendangtsü atema mozüki semdangtsü asoshi jelia sentong yanglur liasü.

Milan kübok San Raffaele hospital nung hopta trok amungba sülen hopta asem dang lir pa tanaben mozükidangi meyipa ao. Hopta trok mozükidangi amungba mapang pa dak azü cancer tapu balaka keta lir ta doctor temi shia liasü

Berlusconi ya küm aika temang nungi timtema aruogo. Pa 2016 küm temulungjang surgery agi aser iba sülen 2020

küm coronavirus tashidak agi tonga mozükidangi munga liasü. Pa taoba küm Senate nung tanaben shimshiaka pa yimjak nungbo aiben mongui liasü.

Ajisüaka pa maneni right-wing Forza Italia party indang tekolakba liasü. Par party ya Ato Kilonser Giorgia Meloni-i aniba sorkar kübok züngsem ka lir.

1994 nungi 2011 küm tsüngda Berlusconi-i Italy len ania liasü. Pai linük rongsenketzüng jenjang ajungkettsütsü tenangzükba nung voter tem atsüa aru ajisüaka linük süntsüh aika akümba sülen pa dak tamang makai küma mapa toktsütsüsa aküm.

Pai arishi küm 33 tain pa tetong Marta Fascina, taoba mapang agiba kinungtsü ana aser chirnur pongu toktsür iba lima nungi pilaogo. Pa shishilembaba nung par chirnurtem kari teyari agüja liasü koba tang USD billion 7 shi alang lir.

Pa den asüpila sentong agitsüba indang osang tejangja memetet ajisüaka Berlusconi-i par kinungertem aser medemertem aremstü atema Milan anasa Arcore nung par kidang Pharaoh-inspired marble mausoleum ka yanglua lir.

China aser danga linüktemi nuclear nok-nü tali yanglur: Report

Stockholm, Aami/June 12 (Agencies): Alima nung nuclear aliba linük tokui parnok indang nuclear arsenals maneni tajungba kuma yanglushir, aser China indang nuclear warheads bendenba 2022 küm shilem 17 agi timba akum, ta Sweden nung aliba Stockholm International Peace Research Institute (SIPRI) ajanga ashi.

Hombarnü sayaba SIPRI Yearbook 2023 nung ashiba agi, 2022 küm January ita China indang nuclear warheads 350 aliba 2023 küm January ita tashinung 410 kumogo aser ano timba akumtsü imlar.

China-i par sepai tashi aittsü asoshi teletmetba agiba nung ajemdaker 2030 tashinung par indang intercontinental ballistic missiles (ICBMs) ya United States mesüra Russia den sako akumtsü akok.

Alima nung sepai timtiba alibaji People's Liberation Army (PLA) ya lir saka China-i ano mitkar indang hadir aser nok-nü tasenba aser tajungba kuma yanglutsü meranga inyaker.

Alima nung January 2023 tashinung nuclear warheads 12,512 lir, koba 9,576 shi military stockpiles nung nungdakba mapang amshitsü yua lir, koba January 2022 dang 86 agi timba, ta SIPRI ajanga asadangtet.

Item rongnung warheads 3,844 shi missiles aser aircraft nung inoka lir aser 2,000 shi -

ajak amai Russia mesüra US nungi - high operational alert nung lir, tetetzü item ya missiles nung inoka lir mesüra nuclear bombers aliba airbase tem nung lir.

China indang nuclear stockpiles timba kumaka alima nung nuclear nok-nü shilem 90 jungnüa US aser Russia nung lir, ta SIPRI ajanga ashi.

Russia-i tashi ajak amshia Ukraine amakba sülen tensa mejungi liaka 2022 küm iba linük ana nung nuclear hadir kasashi liasü, saka tanen makai raraba ajanga linük anaprong nung nuclear forces tsütsü ochishia sangdongba ajemogo, ta SIPRI ajanga ashi.

Russia-i New START Treaty nung shilem agi anena atar ta February ita sangdong, koba US-Russian nuclear arms control indang tongtipang nokdang lir.

Washington-ia missiles aser launcher aliba tesemtem densema Moscow nem updates agütsüba anentsü, ta ita tetenzüklen ashi aser iba Moscow-i accord nung aibelenba meshi tayang kepzüka mera agiba lir ta ashir.

February 24, 2022 nü nungi tenzüka Ukraine amak tenzükler mapang talangka melie Washington-i Russia den linük ana tsüngta tongtipang sentongtem nung jembishinü akaba anena lir.

Russia Tir Vladimir Putin-i July ita tashinung Belarus nung

tactical nuclear weapons ayutsü sentong lir aser Ukraine nung rara tenzükba sülen mapang shia nuclear amshitsü amokbanga arur aser US densema Western allies temi Ukraine yarira arur.

Alima nung nuclear aliba danga linüktem rongnung India aser Pakistan nunga nuclear nok-nü timba akumba amai ajiteter aseer nuclear delivery system tasen yanglu.

"India-i nuclear mamshitsü asoshi nükjidong tulutibaji Pakistan ya lir, saka India-i China linük ajunga tongtetsüsa meta talangba nok-nü yanglutsü asoshi temolung agütsür ama

ajiteter," ta report ajanga ashi.

2022 küm North Korea-ia nuclear sentong nung temolung agütsü, ta SIPRI-i asadangtet.

Pyongyang-i 2017 küm tatemsaba nuclear aketba nok-nü tendanga liasü aser iba linük nungya warheads 30 shi yanglua lir aser ano warheads 50 aser 70 tsüngta yanglutetsüsa oset peria lir, ta ashir.

January ita North Korea lenir Kim Jong Un-i nuclear arsenal renloksü ayongzüka liasü.

United Kingdom-i 2021 küm par warhead 225 aliba nungi 260 kumdaksütsü sangdongba sülen par indang nuclear nok-

nüa timba akumtsü imlar, ta SIPRI Yearbook ajanga ashi.

France-ia third-generation nuclear-powered ballistic missile submarine (SSBN) aser air-launch cruise missile tasen yanglutsü sentong lir aser tang aliba system tasen aser tajungba kuma yanglutsü sentong lir, ta ashi.

Israel-i yimjak nungbo nuclear nok-nü aliba sangdonga mali saka par nuclear nok-nü tema tajungba kuma yanglushir ama amanger.

Yearbook ya SIPRI ajanga küm nung khen alima nung armaments, disarmament aser security jenjang asadanga lir.



Ukraine kübok Kherson nung tzümetsüng adoka alidak yimtung aser trade port tem tzü agi mubanger totzü agi menener aliba noksa nung angur. Ukraine south tsütsü Kakhovka Dam raksaba ajanga lipokum nung mapang talangka timtem tulu ajurutsü. Iba yagi tajemtsü tzü, chiyongtsü supply agütsüba aser Black Sea tashi ecosystem nung kongshitsü.

Mkg nung 1st Open Futsal Tournament June 20 nungi tenzüka asayatsü



1st Open Futsal Tournament dak sentakba nung osangbener senden ka Salangtem Youth nung akaba mapang Salangtem Youth Union ketdangsürtem noksa nung angur. Mokokchung, 12th June, 2023.

Mokokchung, Aami/June 12 (TYO): Mokokchung District Football Association (MDFFA) akhüm nung Salangtem Youth Union, Mokokchung-i ayonga Mokokchung nung 'Mezüngbuba Open Futsal Tournament' ka Mojabi Futsal Turf Salangtem nung tan ita June 20 nü nungi tenzüka asayatsü lemtetogo, ta June 12 nü Salangtem Youth Union ketdangsürtemi parnok Youth Hall nung osangbener senden ka nung jembidang metetdaksü.

Iba asayamung ya tongtibangsa Mokokchung district nung aliba lanur asayartem jenjang ajungkettsü nükla yur ayonger aser iba ya taküm nungi tenzüka 'running trophy' ka küm daksü tebilemba lir, ta Salangtem Youth Union ketdangsürtemi ashi.

Iba asayamung nung mezüng jenjang angur nem trophy den kulikaket aser senpet sen sen60,000/- (sixty thousand), tanabuba nem sen 40,000/- (forty thousand) aser tasembuba nem sen10,000/- (ten thousand) senpettsü. Iba den külemi jurila senpet pungu - Best Keeper, Best Defender, Best Striker, Highest Scorer aser Most Promising Player shima parnok nem kulikaket den sen agi senpettsü, ta tayongerisa metetdaksü.

Jangratemtsü osang kaji; iba asayamung nungi Mokokchung district atema asayartem shimtsü aser taküm Nagaland Inter-District Futsal Tournament nung district tenüng nung parnoki shilem agitsü. Iba maparen dak sentakba nung Salangtem Youth Union aser MDFFA na tenangzüktep (MoU) ka renemogo, ta parnokisa

shisem.

Iba asayamung nung MDFA ajanga referee aser technical mapa balala nung yariteptsü. Tsüngsang tamajungba mekümba iba asayamung June 22 nü tembangtsü sentong lir. Tang tashi nung telok 20-i shilem agitsü tenüng agütsü. Ano tejangrar kar lira parnoki June 15, 2023 tashi nung 9862636365 nung tongtepratepa zülüoktsü koka lir. June 17 nü fixture draw asütsü, ta tayongertemisa metetdaksü.

Iba asayamung ya angati dang reprangtetsü. Asayamung mapang chiyungtsü ayokdak food stall balala lapoktsü. ADS, F & CS Mokokchung, Jamonger-i iba asayamung tenzüksü aser Nagaland Minerals & Mines, Proprietor, Temjenmoa Jamir-i shibangtsü sentong renema lir, ta parnokisa metetdaksü.

City nungi asayar Rodri nem UEFA Champions League Player of the Season naroküm agütsü

Aami/June 12, 2023 (Agencies): 2022-23 season nung kanga junga asayaba sülen Manchester City nungi midfielder Rodri nem Deobarnü UEFA-i Champions League's Player of the Season naroküm agütsü.

Arishi küm 26 tain Spain nung international asayar yagi Honibarnü Inter Milan den Champions League final asayaba mapang goal ka idakja parnoki asaya goal 1-0 agi akok aser iba asayamung takok marok ajungketa liasü.

City pur Champions League nung asaya ajak nung Rodri-i

shilem agiogo aser pai goal ana idakja liasü. Final asaya nung pai ajak dang nungi tajungba asaya aser pa nem Player of the Match naroküm agütsü.

Kasa mapang nung Napoli nungi asayar Khvicha Kvaratskhelia nem Champions League's Young Player of the Season naroküm agütsü aser iba naroküm agizükba sülen arishi küm 22 tain Georgia nung asayar ya iba season kanga takok nung tembangogo.

Kvaratskhelia-i Napoli nungi asayaba mapang league

title benogo aser pa nem iba ita tetenzüklen Serie A's Player of the Season naroküm dena agütsü.

TEAM OF THE SEASON:

Goalkeeper : Thibaut Courtois (Real Madrid)

Defenders: Kyle Walker (Man City), Ruben Dias (Man City), Alessandro Bastoni (Inter), Federico Dimarco (Inter)

Midfielders: John Stones (Man City), Kevin De Bruyne (Man City), Rodri (Man City)

Forwards: Bernardo Silva (Man City), Erling Haaland (Man City), Vinicius Junior (Real Madrid).



French Open tennis asayamung akokba sülen Serbia nung tennis asayar Novak Djokovic takok marok bener tangokba noksa nung angur. Iba asayamung akokba sülen pa No. 1 asayar kümogo aser Grand Slam 23buba koka otsü tasen ka yangluogo.

NFCA-i coaches association tenteta züngoksemtsü tuyu

Kohima, Aami/June 12 (TYO): The Nagaland Football Coaches Association (NFCA)-i sangdong ka ajanga state kübok district ajak nung license bena aliba coach tem dang parnok sasep nung football coaches association tenteta züngoksemtsü atema osang agütsü.

Kasa sangdong ajanga NFCA tir Roko Angami aser general secretary Ayeto Ayemi nati ashiba agi, state kübok AIFF/AFC Football licensed

Coach tem ajak lokti tentet ka küboki aitdaksütsü nükjidong nung iba inyakyim benokogo.

Iba inyakyim ya state kübok football licensed coach tem ajungkettsü aser ajangzükdaksütsü atema aser lir ta kasa sangdong ajangasa metetdaksü.

NFCA-i ashiba agi, NFCA nung züngoksemtsü atema district football coaches association tentetsü asoshi football licensed coach 12bosa alitsü nüngdaker.

Indonesia Open: Prannoy-i anir India nunger asayartem asayatsü



Aami/June 12, 2023 (Agencies): Tang kanga junga asaya alisang HS Prannoy-i anir India nunger asayartem Indonesia Open nung asayatsü, koba BWF Super 1000 tournament ka lir. Iba asayamung ya Mongolbarnü nungi tenzüksü.

Prannoy, shibai taoba ita Malaysia Masters Super 300 title kokogo, pai maneni iba asayamung nung junga asayatsü imlar.

Iba asayamung nung world number 8 India nunger asayar ya mezüngbuba asaya Japan nung asayar Kenta Nishimoto den asayatsü aser iba asaya kokra China nung asayar Shi Yuqi den asayatsü akok.

Kasa asayamung nung Olympics nung medal ana tashi ngur alila PV Sindhu 2021 world championships silver medallist Kidambi Srikanth nata asayatsü. Tena tawa junga masayateti arudar ajisüka iba asayamung nung tajungba asayatsü imlar.

Sindhu taoba asayamung ana nung mezüngbuba round nung tsükatok aser kasa mapang nung Srikanth, Malaysia aser Spain nung quarterfinal tonga asayaogo.

Sindhu mezüngbuba round nung Indonesia tsür Gregoria Mariska Tunjung den asayatsü aser Srikanth China nung asayar Lu Guang Zu den asayatsü.

Thailand Open nung semifinal tonga asayaba sülen Lakshya Sen-i pa form tajungba akümba sayuogo aser pa iba asayamung nung mezüngbuba asaya Malaysia nung world number 10 aser eighth seed asayar Lee Zii Jia den asayatsü.

Commonwealth Games champion aser world number 5 tebur tarep asayar Satwiksairaj Rankireddy aser Chirag Shetty na mezüngbuba round nung Indonesia nung tarep Marcus Fernaldi Gideon aser Kevin Sanjaya Sukamuljo na den asayatsü.

Tebur tarep asayarsa MR Arjun aser Dhruv Kapila na eight seed Malaysian nung tarep Ong Yew Sin aser Teo Ee Yi na den asayatsü.

Maneni tetsür kija asaya nung Saina Nehwal China tsür Wang Zhi Yi den asayatsü.

Tetsür tarep asayar Treesa Jolly aser Gayatri Gopichand Pullela na Japan tsür Rin Iwanaga aser Kie Nakanishi na den asayatsü.

BILEMDANGANG

"Azümesener asoshi tatemtsü aika lir."